



**Atletico Madrid-i Argentina defender
Cristian Romero alizükogo**

**Netanyahu-i UK dang 'Islamic
republic' ajaba atema aitsür**

VOL. XXIII ISSUE NO. 304 (ADOK 304) DIMAPUR AMUNGNÜ (SUNDAY) LUROI (AUGUST) 16, 2026

₹ 5.00

CM Rio-i tali longjemshitsü, Naga yimten latettsü aser FNTA tenzüksü onük jembí

Kohima, August 15, 2026 (TYO): Naga Students' Federation (NSF)-i mokdang ayongaka Honibarnü Nagaland nung 80 buba Independence Day mungogo aser Chief Minister Neiphiu Rio-i tali longjemshitsü, Naga yimten tebilemtsü akhümketa latettsü, FNTA mapa tekara nung tenzüksü aser Nagaland nung yimjung aser tensa maneni süngjema aotsü ayongzükogo.

Tanü Civil Secretariat Plaza nung state-level celebration amungdang CM Rio-i National Flag atsüket aser o jembí.

NSF-i "Vande Mataram" tendaktsüba atema kaketshirtem official Independence Day sentongtem nung shilem magitsü tenokdangba agüjaka tanü sentong agiogo.

NSF-i federating units aser subordinate bodies dang pei pei telongtet nung August 15 nü

school aser shisaliok rejutemi shilem magidaktsütsü tetuyuba agüja liasü.

Parnoki Independence Day benjungmung mesüra national symbols anema masü saka "Vande Mataram" compulsory akümba anema noktaker, aser iba ya tamangba yimsü dak ajemdakba aser kaketshirtem mulungsenttsü aser tangatetba atema lir ta metetdaktsüogo.

Honibarnü Kohima nung NSF volunteers mapa lemozüksü aser iba ya official celebrations nung kaketshirtem o shisaliok rejutem shilem magidaktsütsü atema liasü.

Ajisüaka iba mokdang ya 'voluntary' lir aser nisungtem tashiyim agi shilem agidaktsüba indang official complaint kecha benoka mali ta police-isa ashi.

Tanü school o shisaliok rejutemi NCC, Scouts aser Guides dena kaketshirtem Independence Day parade nung

shilem magidaktsüi noktang.

State yimtiba nung mokdang takok ngua agiogo aser tanga district tem nunga federating units-i kasa mapa inyakogo ta NSF vice president Vimeyiekho Vitso-i ashi.

Tanü sentong National Song tena tenzük, National Flag atsüket aser National Anthem aten. Iba sülen Chief Minister-i parade sema senzü aser police o civil servants nem sempettem agütsü.

"Naga yimten tebilemtsü mapang talangka mebenteti aru aser nübertemi tekara nung latetdaktsünür" ta Chief Minister Rio-i ashi.

State sorkari September 12, 2024 nü Consultative Meeting ayonga amendang kin hohotem, civil society organizations, arogotem, NGOs, kaketshirtem, political parties aser tanga sendaktepa alirtem külemi sabang ka nung adenshi. Iba senden nung yimjung olemtep ya highest political level jenjang nung ajungkettsü aser ibaji political mesüra ministerial tashi maliba interlocutor ka shimtsü jembitepa liasü ta paisa ashi.

Iba takhangba ya September 2025 nung Political Affairs Committee senden nung nenshi aser February 5, 2026 nü Rio-i Union Home Minister Amit Shah aser par Cabinet züngsemtem den maneni nenshia liasü.

Naga peace talks atema Centre-i Minister of State for Home Affairs lenisüba kübok committee ka tentetogo ta CM Rio-i ashi.

Iba committee-i mapa takok ngua inyaka aotsü atema India sorkari olemtepertem ajak den jembitsüla ta paisa shisem.

State sorkari Naga Political Issue latettsü atema teyariteper tajung ka ama maneni shilem agia aotsü ta Rio-isa ashi.

Eastern Nagaland-i development indicators aika nung tangar memenep lir. State sorkari Frontier Nagaland Territorial Authority (FNTA) maparen pusema nungiter aser iba ya Eastern Nagaland nung alirtem taginübatem atongtsü atema lir ta paisa metetdaktsü.

Nagaland sasep nung FNTA tentettsü atema India sorkar, Nagaland sorkar aser Eastern Nagaland Peoples' Organisation (ENPO) tsüngda February 5 Memorandum of Agreement nung sign süogo. Iba tenangzüktep ya kanga dang otsüsütsü aketba ka lir aser state sorkari FNTA tekara nung tentettsü aser mapa inyaktsü atema Eastern Nagaland den amalitep alitsü aser maneni pusema nungittsü ta CM Rio-i ashi.

Nagaland nung law and order tiptema lir aser Nagaland Police o security forces-i tensa süngjema ayur ta paisa ashi.

Chümoukedima district nung Assam Rifles personnel amenba gari ka dak tenük yoka IED pokdaktsüba nung sepai ka asü aser pezü kanga mejungi yiru. Iba tatalokba aitsür aser iba mapa inyaktertem maitsü jangjar merenshitsüla. Iba bushisüngdang ya National Investigation Agency (NIA) ket nung agütsüogo ta CM Rio-isa ashi.

Nagaland State Police-i "War on Drugs" maneni inyakdar. January 2024 nungi May 2026 tashi NDPS cases 407 tema benokogo aser tai tongloktür 677 puogo ta paisa shisem.

Nagaland police-i Ministry of Home Affairs nungi police modernisation assistance ajanga gari tasen 550 angütsü lir aser iba ajanga mobility aser operational capacity tajungba akümstsü ta Rio-isa ashi.

Taküm tzüngluruwa mapang anentsüh aser ajungben tzümetsüng lendong balala atalokogo aser talisa Mon district nung takoksa tulu ajuruogo. Lendong balala atema Centre nungi teyari agia restoration & relief measures inyakdar ta CM Rio-isa ashi.

Nagaland sorkarisa roads, bridges, air connectivity, education, healthcare, sports, skill development, drinking water, power, agriculture, tourism, food processing aser digital governance nung tejakleni aoba osang lemsatep.

Ciethu, Kohima nung IIT ka, Nagaki City lapoktsüba, Chümoukedima nung greenfield AIIMS yanglutsüba, Nagaki incubation city yangluba, sports & higher education infrastructure tasen, tongtipang tesem kar nung short landing strips yanglutsüba aser road connectivity ulushitsü sentongtem lir ta CM Rio-isa metetdaktsü.

India, Nagaland aser Assam sorkartem tsüngda June 2026 tripartite agreement agiogo aser iba ya Disputed Area Belt nung oil and natural gas exploration aser production atema lir. Iba nung tajangzük angubattem kasa lemsatsü aser Article 371A den putepa Nagaland-specific regulatory framework renemtsü sentong lir ta paisa metetdaktsü.

Tanü sentong nungsa Nagaland Integrated Information System (NIIS), Education Management Information System aser Hovukhu, Niuland nung 10 MW solar power plant lapoktsüogo.

Sentong nungsa lisopur kintem indang traditional attires aser ornaments indang kaket ana saya aser Boke Botsa, Kohima nung Naga Model Integrated Settled Farming project lapoktsü.

JKM-i Yajang aser Lizo Model Village nung aputem yanglutsü mepishir

Dimapur, August 15, 2026 (TYO): Japukong Kaketsshir Mungdang (JKM)-i August 12, 2026 nü Yajang 'C' village aser Lizo Model Village semdanga apu ana raksaba reprangdangogo.

Parnoki bangdak Department tem aser sorkar dang Yajang 'C' village nung Milak Bailey Bridge aser Lizo Model Village nung hanging bridge raksaba tekara nung yanglutsü metetdaktsüogo.

July 19, 2026 nü tzümetsüng ajanga Milak Bailey Bridge raksatsü aser iba apu ya Wamaken Valley, Tuli nung Rajeshwari Karuna School (RKS) kaketshirtem, 13th NAP (IR) Battalion Yajang, anogoshi aayangertem, aluyimertem, shishilembartem aser public asoshi kanga tongtipang lir ta JKM-i sangdong ka nung ashi.

Iba apu raksaba ajanga yimdaklirtemi medical facilities aser food & essential supplies belenba nung timtem tulu ajuruu lir. Iba khuret asoshi Yajang 'C' village nung Yajang Kiyong Pezü Medemanger Putu (Village Councils of 4 Yajang Villages), 13 NAP (IR) Battalion Yajang aser Executive Engineer, PWD R&B) Feeder Roads Division, Tuli dena Joint meeting ka ayonga amen.

Ajisüaka Department of PWD (R&B) Feeder Roads Division, Tuli nungi teshimtet nübotem senden nung madenba ajanga onük jembiba nung tetsükdaktsü ajuruu liasü ta JKM-isa metetdaktsü.

Village council temia Yajang 'A' nungi NH-02 (Amguri-Tuli Road) tashi lenmang junga anepalu masüba atema bangdak department dang mepelaba

metetdaktsü. Iba lenmang ya Tuli Sub-division kübok lir aser yimtsüng aika aser Japukong tzükong asoshi tongtipang lenmang ka lir ta parnoki ashi.

Iba asoshi Nagaland sorkar aser bangdak Department dang tekartiba nung Milak Bailey Bridge yanglushitsü ayongzükogo.

Iba apu ya Nagaland Foothill Road nunga shilem ka lira ser Yajang Village mesüra Japukong nung atema dang masü saka Naga nung asoshi tongtipang lir. Anungji Department of PWD (R&B) Feeder Roads Division, Tuli-i Yajang 'A' nungi NH-02 (Amguri-Tuli Road) tashi lenmang jungunga anepalutsü akhanger ta JKM-isa ashi.

July 19, 2026 tzümetsüng agi Lizo Model Village Hanging Bridge raksatsü aser iba ajanga Lizo Model Village nung alirtem timtemer. Tatalokba ka nungbo shiranger ka aou agi yangluba stretcher ka nung mejanger kilometer 2 tema jajatsüsa mapang ka ajuruogo ta JKM-isa metetdaktsü.

Iba yimtsüng nung school lapoka mali anungji kaketshirtemi Longpayimsen aser temeket aliba yimtsüng school tem nung azünger. Ajisüaka hanging bridge ajanga dang senzüya aliba mali akümji parnok kanga timtemer ta JKM-isa metetdaktsüogo.

JKM-i Lizo Model Village Council den ajurutepa sensaksemogo aser idangji parnok timtem angashiogo. Anungji bangdak ketdangpurtem aser talisa Nagaland State Disaster Management Authority (NSDMA)-i iba apu tekara nung yanglutsü ayongzükogo.

25 buba Dr. T. Ao Inter-District Football Championship Oct 12-31 asayatsü

Mokokchung, 15th Aug (TYO): Ajaki yongyaseta ataba Dr. T. Ao Inter-District Football Championship 2026 Oct 12-31 tashi Rempukong Ungma nung aliba astroturf football ground nung asayatsü lemtetogo, ta Honibarnü Mokokchung District Football Association (MDFA) tir, N. Akok Longkumer-i osangbener senden ka Koridang Futsal Ground, Aolijen nung akadang sangdongogo.

Dr. T. Ao asayamung tenzük taküm ya küm 25 ajunger, anungji, ibai asayamung ka dang masü benjong ka ama akatsü terenemshiba tulu lir. Anungji, Nagaland nung aliba district ajak iba asayamung nung arua shilem agitsü pelashishia jaoker, ta MDFA tirisa metetdaktsü. MDFA-i shilem agir district team ajak atema tanendak aser apoktsü

renemtsütsü, ta shisem. Iba asayamung ya All India Football Federation aküm nung Nagaland Football Association (NFA)-i kümshi ayongzüka akar aser taküm MDFA-i agizüka Mokokchung nung asaya-a amungtsü.

Iba asayamung atema MLA & Advisor Temjenmenba tayonger aser Imsongmeren (NCS) tezülür sür maparen balala inyaka odar. Nüngtugu footabll asayar Dr. T. Ao ya Changki yim nungi asünung, NFA-i Changki yim semdanga par yimer nungi temoatsü agia iba asayamung taküm yangi amungtsü lir. Iba denano Dr. T. Ao ya Impur chanu ka asünung, Impur nung aliba ground ji pa tenüng amshitsü sangdongogo, ta MDFA tatong tir Bendangi inyakyonga aruba otsü kar lemsatep.

Dr. T. Ao championship Mokokchung nung ayongzükba ajanga takümbo MDFA Trophy mekatettsüsa akümer, ibaji asoshi sasar, saka sangküm nungi akhi ama MDFA Trophy ji kayonga aotsü, ta MDFA ketdangpurisa metetdaktsü.

Iba osangbeneri tang Ungma nung teyangludak astroturf ground indang metetnua asüngdangdang, "contractor ajanga ashiba agi ground maparenji 80% renemogo aser tournament asayaba mapang tashi nungjibo renemer alitsü imlar", ta MDFA ketdangpuri langzü. Iba ground nung nisung 5000 shi mentettsü, anungji, tereprangi arurtem tim matemtsü aser tayongertemi YouTube ajanga live stream asütsü tebilemba lir, ta parnokisa metetdaktsü.

(Maneni tapak 2 nung...)

NPF Mokokchung Division lanurtem “Leadership Meet” sentong aka



Metsuboi NPF Lanur Ola ta sür music video ka sayatsüdüng tangokba noksa angur.

Mokokchung, 15th August (TYO): Naga People's Front Youth Wing Mokokchung Division-i ayonga 'Leadership Meet' ta sür sentong ka “empowering youth voices for a transformative future” omen dak rangloker parnok indang division office nung kaogo. Iba sentong nung lenla balala nungi NPF lenirtem adenshia shilem agia aden.

Iba sentong nung tetushi tesemdang Nagaland RD & SIRD Minister, Metsübo Jamir-i jembidang, tangar dak metaloka meli-i pei sasa noktaketba lanur kaka asütsü ayongzük. ‘Pei tepok sünger ang tsürabur aser adianu yaritetsüsa alitsü merangang’, ta pai ashi.

Lanurtemji tarutsü teimla aser tsürabur nükla ajak nenok dak lir, anungji, meshimetsüba yimya ya melenshir pei sasa mapa agi inyaka sayuteter kaka

asütsü, pai metetdaksü.

NPF maitsü mamatoksü atema ashidang, tanü Nagaland nung “oppositionless government” aoba ya solution meji lungjemba dang, saka ibai “oppositionless party” masü. Political party shia nükjidong balala lir, ta paisa jangjashitsü. “NPF ya tanga party den memeyokteptsüla”, ta paisa nenshi.

‘Party inyakyim nung ya tekübokba (grassroot) nungi tenzüka jenjang balala lir, aji oda, party nung nükmengi nenok lir aser onok ya kilem (roof) dang, nükmengi tashi meitra aser akanga melira, party ji laotsü’, ta ashi. Anungji, lenirtemi pei mapa meteta tapok mepadaksüi o kisüng masü mapa dena inyaksü asoshi paisa ajungshi. Nükjidong tala masü tulu ayuba den lenir ta asüba tetezü angateta alitsü asoshi ta paisa shisem.

Telungjem nung tashi lir ta angateta kadi ka yaritep nung dang asenok tejakleni aotsü, anungji, lungjemmer takok ngua sayutsü asoshi paisa ayongzük. Mokokchung district nung ya menden 10 lir, anungji, sarkar akümba nung asenok ola tulu lir, ta paisa shisem. Tetushi tesemdang “NPF Lanur Ola” ta sür music video ka sayatsü. Iba kenji NPF Youth Wing YouTube channel nung angutsü.

Nisung shia tejangraba aser nükjidong balala yur politic nung ajemoker, saka nübur taginüba ama lenji-i aotsü merangang aiben asen tebilemba tezülen yutsütsüsa akümer. Anungji, temelenshi ka adokdi süra yim politics ya toktsür mulungsentsü melenshir lenla tasen ka tenzüka aotsü nüngdaker, ta tongti o jembir taoba MLA & CEC Member Imnatiba-i metetdaksü.

Temelenshi ka bener arudi süra tzükong 6 sangertemi pei tzükong atema dang mebilemetsüla. Saka tebilemba ajak benteper “arok tarutsü (collective future) ka dang yanglutsüla”, ta pai ashi. Akhi yimya nung dang odi ta süra asenok tejakleni mera moutettsü, ta paisa shisem. Anungji, lanurtemi alima tejakleni aotsü asoshi tensa den apert inyakyim (model) tasen ka yangertsü asoshi paisa ayongzük.

Paisa lanurtem nem inyadaksünüba tebilemba ka lemsatepdang, Mokokchung nung ya “Nagaland Pioneers & Heritage Centre” ta sür ka tenzüka nung ajungtsü aser iba centre nungji Nagaland otsü aser lipoklisang tapu balala bendena yutettsü aser ibaji shisa tarok bushiba riju ka küma otettsüsa ngujem tulu yur inyaksüla. Paisa iba dak sentakba nung ashidang, Mokokchung district nem “Land of Pioneers” ya Nagaland CM Neiphiu Rio-i agütsüba lir, anungji, Mokokchung division lanurtemi iba mapa merangtsü asoshi paisa ajungshi.

Iba sentong nung lanur

parnok 22 tashi division aser A/C level mapa balala nung ainoka tenangzükba agi aser ibaji NPF Mokokchung Division President Repameren Yaden-i ketdang süa liasü.

Iba sentong nung NPF Central Youth Wing President N. Akok longkumer, Mkg Div. Y/W President Takonungsang Pongen, Mkg Div. Y/W Working President Alichang Kichu, Y/W 22 Arkakong A/C President Wapangtoshi K. Jamir, Y/W 25 Mongoya A/C President Imsutoba Jamir, Mkg Div. Y/W Secretary Nungshisenla parnoki shilem balala agi.

Tanabuba senden “Media Awareness” ta sür “navigating the digital frontier: Media literacy, cyber laws, and leveraging media for political leadership in Nagaland” onük nung agi aser iba sentong nung shisalen sayurji Toshi O. Longkumer Advocate, Guwahati High Court Kohima Bench liasü. Mkg Div. Y/W Vice President Limatongzük Jamir onir liasü aser Mkg Div. Y/W General Secretary (Admin) Temsulong-i melepzüng o shia iba sentong tembang.

JCF-i gari tulu nokdangtsü ayongzük

Dimapur, Luroi/August 15 (TYO): Joint Council Forum ajanga DCP (Traffic), Dimapur dang school-i aoba mapang aser traffic kanga bulua aliba mapang Dimapur main town area nung gari tulu senzusempongba repringtsü mepishia liasü.

Taoba mapangbao iba ama main town nung kanga mazüngi nüburtem aser gari senzüdang gari tulutem senzüba nokdanga nüburtem takum kumzüka ayuba den senzusempongba nung tetsükdaksü meliasü. Ajisüaka tangbo school-i aoba mapang aser gari aser nüburtem kanga mazüngi senzütepa mapang jila telung nung gari senzüba angur, ta JCF ajanga ashi.

Onoki talisa school-i aoba tanurtem, tetsüng agi

senzürtem, two-wheelers aser gari tala nung senzürtem asoshi bikemtsür. Dimapur nung gari tali kumer lia lenmang temesü town areas nung gari tulutem kanga kera senzüba ajanga lendong timtem ajurutsü melamela akumer, ta parnoki ashi.

Anungji nüburtem kumzüka ayutsü mechi iba ama mapang nung gari tulutem senzüba aziüoktsü mesüra nokdangtsü atema nüngdakba mera agitsü ayongzüker. Iba amala gari tem akok nungbo main town lenmang masü four-lane highway amshitsü ajungshitsüla. Dimapur nung traffic tajungba mapang kerdangtsü aser nüburtem lendong nungi kumzüka ayutsü mechi ajaki amalitep akatsü ayongzüker, ta Joint Council Forum ajanga ashi.

Temang mekokmeinertem tebilemetsü angatetjem sentong agi



Mokokchung, Luroi/August 15 (TYO) : Mokokchung Baptist Arogo tayonger aser Mokokchung District Disabled Association (MDDA) Repsem Tayonger sür tanü Mokokchung Baptist Arogo nung Mokokminer (Disabled) Tebilemetsü Angatetjem Sentong tajung ka Mokokchung Telungtet Ao Arogo Tenzükertem asoshi ayonga kaogo.

Mr. Temsüwati Asso. Pastor Mokokchung Baptist Arogoi mezüng senden ketdang süa tenzüka. Tsüngremer lenisüba jazüka Mopongchuket Baptist Arogo Pastor Rev. Jongpang-i sarasadem aser Mokokchung Baptist Arogo Pastor Rev. Imtimenpang-i tarur pela agizük. Iba den Imkongnungchet Kichu, MDDA president-i sentong nükjidong tarur den lemsa. Sentong shilem ana küma lemsar agi aser tanabuba

senden nung Moderator Mrs. Arenli Jamir Advisor to Mokokchung District Disabled Association la leniba nung agi. Tongti tesemdang Shri. Tongpang L. Jamir, State Commissioner for Person with Disabilities, Nagaland liasü. Pai tesentepertem den tongtipang onük aika nung amshia shisa o tajung lemsa. Talisa 'The Rights of Persons with Disabilities Act 2016' indang kanga junga rajema lemsaba ajanga tesentepertem shisatsü tajung aika angur. 'Arogo aser Mokokminer' Onük nung Mr. Maong Jamir, Secretary, Finance and Property ABAM-i jembidi. Iba onük nung ajemdaker Arogotemi inyaktetsüba sür nung merajemba ajanga meinyakteti toktsüba onük aika nung kongshia jembia liasü.

Mokokchung District Disabled Association ya 2018 küm tenzüka lir. President den

jembidang pai ashiba agi, iba ama sentong ya asen Mokokchung tesem nungbo mezüng lir ta ashi. Iba den onok mokokminertemi ajuruba tebilemetsütem ya junga aser anema alirtemia angatetsü jenti lir asü nung Mokokchung Baptist Arogoi rongsen jenti oa iba sentong ayonga katsüba asoshi Sannükeri anir Arogo Deacon Board aser Arogopurtem dang kangasa pelar ta lemsa. Tanü iba sentong nung Kohima nungia Mokokminer tanur asem, Mr. Aripang Kichu. Mr. Khaikho Sangtsoi Nokkhiolam aser Mr. Wapongmeren Longkumer parnokia shilem tajung agia sentong nung temoatsü lemsa. Sentong nung Mokokchung Telongtet Ao Arogotem 27 nungi delegates 76 aser Grace Society Changtongya nungia nisung ana arua shilem agia temoatsü nung tempang.

25 buba Dr. T. Ao Inter-District... (TAPAK 1 NUNGI...)

“Taküm iba asayamung jubilee küm asünung, senpet sen (cash prize) ajungkettsü tebilem lir mali?” ta metetnua asüngdangdang, “tatsüka lir koma asütsüar ashitsü makok saka tang tashijibo senpet sen ajungkettsü NFA nungi kecha osang yoka mali”, ta langzü. Tangji champion team nem sen lakh 3 aser runner up nem lakh 2 agüja arudar.

“Iba osangbenerisa taküma Mokokchung district terenemshiba koba tashi odar?” ta metetnua asüngdangdang, “taküm ya jubilee küm asünung, Mokokchung district nung asayaba tournament balala nungi nisung 80 shi shima tetendangba agia liasü. Item rongnung selection committee ajanga ochishia aser kanga junga tendanger nisung 20 shimteta lir. Item asayartem tenüng mapang tetemsü nung sangdongtsü”, ta

Mokokchung District Team Manager, Yimya Jamir-i metetdaksü.

2024 küm Dr. T. Ao Championship Tuensang nung asayadang Mokokchung team quarter final nung tsük aser yaküm 2025 nung semifinal nung tsük, saka taküm yabo final tongteta 25 silver jubilee edition yabo Mokokchung-i tepzüksü merangtsü, ta Team Manager-isa metetdaksü.

Mokokchung team atema head coach-ji tangalen nungi anir arutsü bushidar, Assistant Coach Tongpang shima lir, ta MDFA-isa metetdaksü. Taküm iba asayamung ya balaka asütsü, anungji, iba asayamung takok ngua agitetsü asoshi lokti tentet aser nüburtem ajaki amalitepa aser nungita yaridaksünür, ta MDFA ketdangsurtemisa mepishia metetdaksü.



New Delhi, August 15, 2026: Red Fort nung 80buba Independence Day anogomong sentong nung Union Minister tem- Rajnath Singh, Amit Shah, Kiren Rijju, Kinjarapu Ram Mohan Naidu, Lok Sabha Speaker Om Birla, Chief Justice of India, Surya Kant aser tangartem adenba noksa nung angur.

PM-i LS nung tetsür nem menden 33% lemozüksütsü mepishi

New Delhi, Luroi/August 15 (Agencies): Honibarnü Ato kilonser Narendra Modi-i party ajak dang Lok Sabha aser state assemblies nung tetsürtem nem menden shilem 33 lemozüksütsü atema Parliament nung Women's reservation pusemdaktsüner, ta mepishi.

Paisa, women's reservation ya yimtenren rara ka mekumdaüksütsü, ta ashi.

Pai lanurtem dang 2047 kum tashi nungbo India ya terenlok linük ka akümtsü atema loktiliba aser rongsenkettsüng tsütsü lenisüba shilem agiang, ta ayongzük.

Honibarnü Red Fort nung India nung Independence Day anogomong tongti sentong

nung jembidang Modi-i, women's reservation atema yimtenren party temi tenüng tajung agütsü akok, ajisüaka tetsürtem nem parnok tim temeden agütsütsü atema inyaksüla, ta ashi.

Delimitation dak sendakba constitution amendment bill ka taküm April ita nung Parliament nung magizüktetba dak sendakba nung Modi-i, "Tanü yangi Red Fort nung nokdaker ni linük nung yimtenren party ajak dang tetsürtem nem tashi agütsütsü mepishir," ta ashi.

Yimtenren tsütsü mangatettep ajanga tetsürtem reservation ya tesüiba kum 40 tashi anendaka lir, ta shia Modi-i, "Tetsürtem nem akhüm

agütsütsü aser asen ojalatem aser aianutem nem tekeraba nung Legislative Assemblies aser Lok Sabha nem menden shilem 33 agütsütsü atema inyaksüla. India nung asalentong yangluba nung parnok nem shilem agidaktsütsüla. Nenoki tenüng tajunggi agütsü akok, ajisüaka yimlibilema asen ojala aser aianutem nem parnok tim temeden agütsütsüla," ta ashi.

Lakhpatri Didi dak sendakba nung Modi-i, sorkari mezüngbo Lakhpatri Didis crore 3 atemzuka liasü, aser iba alizünggi tangbo tongtetogo anunggi alizüng tasenbaji Lakhpatri Didis crore 6 asütsü, ta metetdaksü.

2027 March tashi doctor tem mapa nungi animesüngzüksü: CM Sukhu

Barsar (Himachal Pradesh), August 15 (Agencies): Honibarnü Independence Day anogomong sentong nung jembidang Himachal Chief Minister Sukhvinder Singh Sukhu-i, sangkum March 31 tashi sorkar doctor tem shinga mapa nungi animesüngzüksü, ta metetdaksü.

Paisa, tan ita tatembanglen tashi nung class IV employees nem arrears agütsütsü, ta ashi.

Sukhu-isa, ASHA workers nem incentives sen 1,000 tutsütsü, iba denji külemi National Health Mission (NHM) kübok inyaker staff nurse, pharmacist, operation theatre assistants aser laboratory technicians nem remuneration sen 25,000 agütsütsü, ta metetdaksü.

Hamirpur district kübok Barsar nung Independence Day sentong nung jembidang chief

minister-i, 2032 kum tashi nungbo Himachal Pradesh ya takartiba state tem rongnung ka akümtsüji pa nukjidong lir, ta metetdaksü.

Paisa, Class I aser Class II pensioners aser family pensioners nem August ita nung arrears shilem 15 agütsütsü, aser iba atemaji state senpong nungi sen crore 281 indoktsü, ta ashi.

Ita shia ASHA 9,000 nem incentive sen 5,800 agüja aliba nungi sen tutsür 6,800 agütsütsü aser NHM nung data entry operators nem ita shia sen 18,000 agütsütsü.

Chief minister-i, tawa Centre sorkari sayaba National Family Health Survey report nung Himachal Pradesh nung tetsür aser tanurtem healthcare tajungba akümba metetdakja liasü, aser ano tajungba akümtsü atema state sorkari Indira

Gandhi Matri Shishu Sankalp Yojana mapatong benoka tetsür aser tanurtem nem chiyungtsü tajung agütsütsü; mezüngbuba shilemji takum October 2 nungi tenzütsü aser iba shilem kübok state nung block 21 ayimjemtsü, ta metetdaksü.

Paisa, tang tetsür aser tanurtem nem jang, menjang, amtsük, panjiri aser mamatzü powder agütsür, saka tarutsü nung ano chiyungtsü tajungba agüja hopta nung asemben packaged premix chiyungtsü, mamatzü aser antsü agütsütsü, ta metetdaksü.

Yimtsüngtem nung aliba kibongtemi ita shia sen 20,000 nungi 25,000 tashi aatetsü atema sorkari aluyimba, süngjanglu, kiset shiruru metsüba aser ango mesüba sectors nung mapatong tasen aika benokogo, ta metetdaksü.

CJP indang Instagram account India nung ghonda ana nokdang

New Delhi, Luroi/ August 15 (Agencies): Honibarnep India nung Cockroach Janta Party (CJP) indang Instagram account ghonda ana shi nokdang, ajisüaka bendanglenbo CJP account ji amshiteta liasü, ta parnoki metetdaksü.

Tang agi tanabenbuba India nung CJP indang Instagram account nokdang.

Iba dak sendakba nung CJP-i, onok anemertemi onok ola nembangtsütsü atema Independence Day ama anogo ka dang shim, ta aitsü.

India nung CJP account ghonda ana nokdangba dak sendakba nung tang tashi nungbo Meta-i

tasüngdangbatem atema telangzüba kecha magütsü.

CJP-isa, CJP Instagram lapoktsü merangertemi account lapoktsü merangba mapang nung Instagram message sayuba indang screenshot ka lemsatep.

Instagram message ji yamai liasü, "Tangbo iba page ya mangur. Iba ya technical tsütsü timtem ka ajanga asütsü akok, onoki yanglushitsü atema inyakdar. Iba page tanaben load asütsü merangdangang."

Instagram account nokdangba aija CJP-i X ajanga, "Iba ama tasümaita mapa ajanga onok amokmeren mesüdaüksütsü," ta metetdaksü.



August 15, 2026 nü Lucknow nung Independence Day anogomong sentong nung telok kati tsüngsangba mapang tangokba noksa nung angur. Kasa noksa nung Uttar Pradesh Chief Minister, Yogi Adityanath aser Deputy Chief Minister Brajesh Pathak na den tongti ketdangsertem angur.

Rajasthan nung Uniform Civil Code benoktsü: CM Bhajanlal Sharma

New Delhi, August 15 (Agencies): Rajasthan chief minister Bhajanlal Sharma-i, state sorkari Rajasthan Civil Code 2026 benoktsü tebilemba lir aser iba ozüng ya linük temzüng kübok Arrla 44 nung ajemdaker benoktsü, ta metetdaksü.

Iba Arrla nung Uniform Civil Code (UCC) benoktsü atema shia lir.

Dr Karni Singh Stadium nung Independence Day anogomong sentong nung jembidang Sharma-i, state nung senso ajak atema kasa ozüng alitsü nukjidong nung UCC benoktsü, ta ashi.

Chief minister-isa state nung tzüzüng-ozüng benoktsü aser tensa tajungba akümtsü atema sorkari inyaka aruba mapatem metetdaksü.

Ozüng alema inyakba mapatem nokdangtsü aser ochimashi nokdangtsü atema sorkari telemtetba aika agia inyakdar, iba denji külemi state tesem ajaklen security tashi itshitsü atema tongtibang telemtetba aika agiogo, ta pai metetdaksü.

Paisa, ashikülak ajanga mesüra mesüzuka tamangba yimsü meyipdaksüba nokdangtsü atema sorkari ozüng ka benokogo, ta metetdaksü.

Sharma-isa, 2047 kum tashi nungbo 'Viksit Bharat-Viksit Rajasthan' nukjidong ataloktsü

atema state sorkari inyaker, ta metetdaksü.

Sharma-i, "Tanübo India-i jembibaji alimai kanga junga angaa atar. India tejakleni odar aser alima sabang nung maneni jenjang tajungba kümdar," ta ashi.

State jenjang ano tajungba akümtsü atema kanga tongtibang project anaji HPCL Rajasthan Refinery Project aser Mahi-Banswara nuclear power project na ya lir, ta pai ashi.

Electric power tsütsü Rajasthan-i tangar dak kangabo memetaloker; linük nung solar power capacity tsütsü state tem rongnung Rajasthan temaba jenjang nung lir aser renewable energy capacity nunga tanabuba jenjang nung lir, ta pai metetdaksü.

Kasa sentong nung chief minister-i sorkar ketdangsertem aser sorkar mapa inyakterem nem medals aser certificates lema agütsü.

Kasa sentong nung Rajasthan, Odisha, West Bengal aser Uttar Pradesh state tem nungi telok balalai shilem agi aser state tesem balala nungi school tanurtemi shilem agi.

Iba sentong nung Union Minister of State for Law & Justice Arjun Ram Meghwal, chief secretary V Srinivas, director general of police Rajeev Kumar Sharma aser tongti ketdangsertem aika liasü.



August 15, 2026 nü Dehradun nung 80buba Independence Day sentong nung Uttarakhand Chief Minister Pushkar Singh Dhami den tangartem tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 16, 2026

Temenen tapu ka !

Nisung tepsetba, nüktapangta aser nisung ashioktsüba mapatem ajakji Tsüngrem tsüngdang temenen ta asenoki meteta lir, Aji oda, item temenen mapatem nung jagibo asenok aika jenbua alitsüa akok. Ajisüaka, asenoki temenen a ta mezüngshiba temenen tapu ka agi asenok anogo shia Tsüngrem nungi tepilaba-tepilaba odakja alitsüa akok. Iba temenenji asenoki tajung inyaksü bilemer meinyakba temenen asütsü. Asenok aikati Tsüngremi temulungjang dang agir asünungji temulungjang nung tajung inyaksü bilemba kija jagi Tsüngrem mulung chidaktsür ama bilema alitsüa akok. Ajisüaka, tajung inyaksü temulung nung bilemer mapa kuma meinyakbaji Tsüngrem tsüngdang aibelen tulu lir. Laishibai ashir, tajung inyaksü bilemer meinyakbaji TEMENEN. Iba temenenji asenok aika atema anogo shia Tsüngrem tsüngdang menaba tai temenen ka asütsü. Kodang asenoki temulung nung tajung inyaksü bilemer meinyaker, ibaji temenen ta Yakob tapu 4:17 nung shia lir. Asenoki aiben tajung inyaksü bilemer saka mazüngba agi kenlir inyaksü ayur mesüra makoktsü amai bilemer mesüra iba tajungji inyak nunga kecha balaka masütsü amai bilemer. Aji oda, tajung inyaksü bilemaka meinyaktetba kuli aika asenoki agütsütsü meranger, saka Tsüngremi tajung inyaksü bilemer meinyaktetba kuli asenok dang nungi memeshir. Asenoki metettsüba kaji, akhi putu nung Tsüngremi ola agi jembi, saka tanü putu nungbo ola agi masü saka asenok mulung nung bilemba ajanga jembir. Aji oda, tamajung ajak mojing nungi aser tajung ajak Tsüngrem nungi asünungji, tajung inyaksü bilembaji asenok den Tsüngremi jembir ta angatettsüla. Idangjisa asenokia temulungjang nung sarasadema Tsüngrem den jembitsüla aser Tsüngrem bilemba aser taginübaji angatettsü merangtsüla. Asenoki aiben mapa tajung inyaksü bilemba kija jagi Tsüngremi aginüba inyaker ama bilemer. Ajisüaka, yamaji masü, iba ama bilemba jagi asenoksasa asenok ashioktsür. Temulung nung tajung inyaksü bilemba o Tsüngremi ashi angaa inyakba na tetsüngda talangka lir. Aji oda, tajung inyaksü bilem shia meinyakra, tajung inyaksü bilem shia tai kaka menar asütsü. Aiben, asenoki asenok teyari nüngdakba tesem tonga moi anogo süitemdaktsür. Aiben asenoki tangar tsüngdang tajung inyaksü kuli asür saka meinyaker. Aji oda, tajung inyaksü lemteter meinyakbaji Tsüngrem tsüngdang temenen, anungji Laishibaisa ashir, tajung inyaksü nangzüker meinyakdang nungibo menanzükang tajungba. Aji oda, tajung inyaksü bilemer meinyakba dang nungi kenyongi tajung inyaksü tebilema mebilemang tajungba asütsü ta ashiba o ji tulu lir. Tsüngremi tashi angaba aginer ta asenok ajaki meteta lir, saka asenoki pai aginüba ama mapa agi inyaka mesayutetra, asenok Pa tsüngdang tashi angartem masü tashi mangartem akümer. Tsüngremi Pa o angar dang masü saka teinyaker kaka kümdaktsüner ta Luke tapu 6:46 nung shia angur. Aji oda, Tsüngremi tajung inyaksü bilemba mulungjang dang masü tajung inyakba teka aser tetsüng aginer ta asenoki angateta tajung inyaksü bilemba ama mapa agi inyaktetra, Tsüngrem nükjidongbo idangji dang atongtsü. Tanü nai tajung inyaksü bilemer meinyak yutsüba mapatem kwi asütsüar, kenbilemdangang aser paibenji nai Tsüngrem anema tai menaogo ta metetang.

OLEMSABANG

AJEMALUA AREMZÜKBAJI TASÜ-TAIT HADIR KA LIR

~ L. Kika Pongener.

Tanü asenok aliba lima nung kija taküm nungi tenzüker; asenok adenba loktiliba ajak nung; tenokdangba tensa tia aiben ajurur aser item tensa tia ajakji ajurua aodang; asenok taküm jaklaliru azüoka; ajemalua tila kümer aremzüka; item tensa tia ajakji ajangdanga aotsü merangtsüla. Asenok nisung'er shisatsü agi bilemstsübo; ajemalua tila kümer aremzükbaji; tangar küpoki yia jenjang makai akümer aser tangar dang aputaker ama bilemstsü akok. Asenok iba temenen lima nung alidang; tangari asen kija dak, mesura asen adenba lokti dak tashiyim agi tim-masüba mapa inyaksü akok. Ajisuaka, asenoki ajemalua tila kümer; parnok denji meküptepi aremzükra....Ibaji kanga-sa shisataka mapa ka inyakba aser takok tuluka anguba ama bilemstsüla. Nisung ajakbo tangatetba küsa masü karbo tangatetba kanga-sa tila lir....Nisung karibo tanü ajung asa-a; mesura tanü takok asa-a, pei madak lennir anema; külemi tenzüker anema; mesura pei tenzükbba lokti raksatsüsa; ambangyima aser tashiyim agi tim masüba mapa; lokti inyakyim den mapetba; mesura sobaliba dak maketba mapa inyaksü akok; aser ibaji takok tuluka anguba amai konang kuma bilemstsü akok. Ajisuaka, aji takok anguba masü; saka tamakok anguba ama bilemstsüla. Kechiyong shirnoki tashiyim agi akoktsü meranger; parnok denji meküptepi; ajemalua tila kümer ola madoki aremzükbaji; parnok madak takok anguba amai bilemstsüla; kechiyung ajemalua tila kümer aremzükbaji tasü-tait hadir ka lir.

Otsüla oboula nunger mapang nungi benshia aruba asen sobaliba tajung kaji.....Senso tajungibo tambu-su agi azü-azüa talangka aremzüker aser parnok dakji yimli alitsü. Senso tajung kati kodanga mangateter den mangateter ka amai meküpteper. Asenok Yisu dak amanger asünung laishiba nung züngdangra...."Shinga nunga tamajung melena tamajung tagütsü" (Rom-12:17). "Tamajunger den terara, saka shibai ne tenibung tajichi nung madir pa tsütsü külenjia tendakang" (Mathi-5:39). Ajemalua tila kümer aremzükbaji tarutsü nung takok angutsü hadir tajung ka asütsü. Ajisuaka, tashiyim agi akokba aser meinyaktsüyim inyaka takok angubaji tasü-mait hadir ka lir. Mashi-malo nisungi pei adianu, pei pur-medemer aser külemi tenzüker dak tanü ajung asa-a aser tanü takok asa-a, tashiyim amshia; meinyaktsüyim inyaka akoktsü merangtsü. Ajisuaka, tangateter nisungibo timyim agi akoktsü merangtsü. Anungji tangateter o mangateter na tetsüngdaji ongdang tuluka ita lir. Kechiyong mangateter aser mashimalo nisungibo; tangar anema tamajung inyakbaji; tangaribo meinyaktettsüba mapa ka inyaktet amai konang kuma bilemstsü....Saka tangateter nisung-ibo tangar dang tatishitsü lesson tajung sayutsü merangtsü.

Tejen putu nung.....Persia yimli nung Ahasüerus chuba küpok tongtipur ka tenung agi Haman liasü. Iba Haman ya Ahasüerus chubai pa den atongba temaba menden nung mendaktsü. Aser Ahasüerus chubar kima kiküm nung alir tenzüker ajaki Haman kodang arudir; pa dang aputaka külema akümtsübu sayu. Ajisuaka, Yihuda nunger ka tenung agi Mordekai (Esther chubatsür teko) paibo Haman dang maputak aser akümtsübu mesayu; kechiyong Mordekai nisung dang masü; saka Tsüngrem dangang akümtsübuttsüla aser aputaka külemtsüla....ta angatetba agi pai Haman dang akümtsübu mesayu. Yongji, Haman-i Mordekai dang kanga mepela. Anungji Haman-i Mordekai dak mokokachi tenzüker aser kodaser Mokdekai dak tamajung inyaksü; iba lenmangji bushi. Ajiser, Haman-i tasa tamajung ka atonga Ahaserus chuba dang nungi temelaba agir....Yihuda nunger Mordekai-ji soseta sudaktsütsü atema sung sabang suklep tenem talangka yanglu; aser Esther chubatsür-i Ahaserus chuba asoshi renemba benjong anogo ka nung nubur ajak sentepa lia....Yihuda nunger Mordekai-ji; iba sabang nungji soseta sudaktsütsü Haman-i tasa tamajung ka atong. Ajisuaka, tia maka iba sabang nungji....Mordekai-ji masü; meyiper Haman-ang soseta asütsüsa tensa mapang ka bentsür aru. (Esther tapu 6 & 7 nung züngra iba otsü angutsü).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China nung tepuokdak nungi chiokba Pastor ka dak cancer putet



Pastor John Cao

August 15, 2026: China nung Khristan lenir, pastor John Cao kum tenet tashi tepuokdak ayuba sülen 2024 kum nung ang tepuokdak nungi chioka liasü; tawa pa dak late-stage prostate cancer putetba den külemi tongtiret nung tumor aliba putetogo, ta Khristan melungtet teloktemi metetdaksü.

Pa dak cancer tashidak den külemi tumor putetba ajanga pa US-i oa par kibong den longjemtsü atema pai China toktsür moutettsüa akok.

2017 kum March ita nung pastor Cao China-Burma arrtsülen aliba mapang nung ketdangsertemi pa pua liasü.

Ozüng alema arrtsü adena senzusembongtsü atema pai achaayangtsür, ta pa aija pa kum tenet tepuokdak ayutsü atema obendang agüja liasü.

Cao-i Burma nung school tem lapoktsüba den külemi sensakertem yaria arur.

Tesülen United Nations Working Group on Arbitrary Detention-i, pastor Cao apubaji ozüng alema lir, aser iba ya yimsü nung ajemdaker pa anema inyakba lir, ta bushiteta liasü.

Ajioda Cao kum tenet tepuokdak ayuba sülen 2024 kum March ita nung chiok.

Ajisüaka pai passport mengutetba agi US-i mouteti tang tashi China nung lir.

Taküm April ita nung Cao-i pa dang taochi sayua pa nem passport agüjang ta mepishia liasü. Iba mapang nungjisa pa temang nung tashitsü atua hospital-i oa among.

Hospital nung amongba mapang nung pa dak late-stage prostate cancer tashidak den külemi tongtiret nung tumor aliba puteta liasü.

Pa dak cancer mesenji teret-tenüngla tashi nunga prokshiogo.

Iba osang angashia pa kinüngtsü aser chirnurtemi pa semdangtsü atema China-i aru.

Taküm July ita tetenzüklen China nung pastor Ezra Jin-a tepuokdak nungi chiokogo. Beijing nung aliba Zion Arogo tentetsang, Pastor Ezra Jin Mingri ita 9 tepuokdak aliba sülen chiok, iba sülen pa United States-i ogo.

Taküm May ita nung US Tir Donald Trump-i China semdangba mapang nung pai China Tir Xi Jinping dang pastor Ezra chioktsü mepishia liasü.

China nung ketdangsertemi yimsü balala ajak azüoker aser parnoki melaba tentet nung adentsü memelungba Arogotem anema inyaker.

China nung ketdangsertemi talisa mapang shia underground churches aser house churches mita oa Arogo nung lenirtem aser züngsemtem apur.

ANOGO ABEN TSÜNGREM DEN

MAPANG ANASA ASOSHI TAMAITSÜ

Aser parnoki pa dang asüngdang, "Tesayur, süra itemi kodang ataloktsü? Aser kodang ya ataloktsü mapang anasa aitdir tamaitsüji kechi alitsü?" ~ Luk 21:7

Tsüngrem dak alaka kechisa tetenzük lir, ajak asoshi tatembang ka lir. Naro tobur tajung azülar, asenoki meimba kiset shiruru arishi tembanga asür, kiojen mapang ka tongerbo jetsa-a aor aser meimchir taküm arishi tembanga asür.

Asenok tang aliba taochi putu asoshia kechi koda tembangtsü, Tsüngremi anogo aser mapang ka lateta lir. Nütsüngtemi iba anogo kodang aruts? metetnüa Yisu dang asüngdang. Koba kum, ita, anogo mapang nung tatem anogoji arutsü ibajibo Tebu Tsüngremi dang metet, saka iba tsüngkum aser mapang indang takzüa litettsüsa alima nung asenoki metettsüsa tamaitsütem balala angutsü ta Yisui langzü.

Asenoki shisadangdi iba tatembang anogo, Yisui ashiba ama tamaitsütem memetdaksüi dang aru ka asünunga koda süla? Asenok merenemjungi lira koda sasatsü. Ano asen taküm arishi tatembang anogoji tonga arur asü? Anogo aser mapang memetetaka asenok Tsüngrem kapu nung kumzüka lira koda anisüngzük aser tepela tulu alitsü. Tanü kechi tia ajurutsü memetet, ajungbena tanü na jara Kibuba ajurutsü renema lidi.

SARASADEM:

Kibuba Yisü kü arishi kanga tatsü, ibaya teti alitsü lima masü anungji aiener ka alitsü ama nai yariangma. Amen

Jaranwala nung Khristantem amakba ken o nung Muslim nunger ka aitsüogo



2023 kum Pakistan kübok Jaranwala nung Muslim nungertemi Tenla kitem amakba sülen tangokba noksa nung angur.

August 15, 2026: 2023 kum Pakistan kübok Jaranwala nung Khristantem amakba, Tenla ki raksatsüba aser kiojen aika raksatsüba ken o dak sendakba nung Pakistan nung aliba anti-terrorism court kati tang mezüng Muslim nunger ka aitsüogo.

Jaranwala nung Tenla ki ana raksatsüba atema court-i pa kum ter tepuokdak ayutsü obendang agütsüogo.

July 12, 2026 nü Faisalabad Anti-Terrorism Court nung Judge Waseem Mubarak-i, Tenla ki ana amakba ken o

balala ana nung Irfan Yousaf-i shilem agia lir; Salvation Army Church aser Peace Mission International Church raksatsüba nung pai shilem agia lir, ta metetdaksü.

CCTV kuli nung ajemdaker Tenla ki raksatsüba nung tongti aibelenerji Yousaf liasü ta jangja.

Pakistan nung Punjab province kübok Jaranwala nung Khristan anati Quran kaket raksatsü aser ainakar Muhammad atala, ta tai tongloktsüba sülen 2023 kum August 16 nü Muslim nunger telok tului Khristantem

nisung meyrjang aikati shilem agia liasü, noklang aika apu saka teimbaka chioker nisung ka dang aitsüba ajanga meimchir temeden atema telok balala melung masür.

Obendang agütsüba mapang nung Judge Mubarak-i ozüng benokba agencies aija, police-i iba ken o jungjunga bushisüngdang masüba agi aibelenertem anema ken o junga mebenoktet, ta metetdaksü.

Jaranwala nung Khristantem amakba sülen anogo trok menor ang police-i ken o benoka liasü aser rara adokba mapang nung police-i ibaji nokdangtsü atema meinyak mesüra police tali memeshisem.

Iba dak alia kuli junga mebenden. Item ama tashimait balala ajanga aiben aibelenertem temerenshi nungi jenbur.

Meimchir temeden atema inyakba telok balalai, Jaranwala nung Khristantem amakba nungji nisung 5,200 dak temai shilem agi saka nisung noklang ishika dang apu aser parnok teimbaka bail nung chiokogo ta metetdaksü.

Muslim nungertemi Tenla ki aika rongdoktsüba den Tenla ki aika raksatsü aser Khristantem kiojen aika raksatsüba sülen ghonda 24 tsüngda police-i Muslim nunger 100 dak tema pua

liasü.

Iba mapang nungji Regional Police tongti, Rizwan Khan-i, iba tatalokba dak sendakba nung melung melemi police-i nisung 129 pua lir aser tensa azüoktetogo, ta metetdakja liasü.

Pakistan nung Khristan adianu anati Muslim nunger temeshi kaket Quran nungi tapak kar shisaja mezüngmeshiba otem zülua toktsü, ta tai tongloktsüba sülen Muslim nungertemi Khristantem anema apuso.

Faisalabad district nung aliba mosque ka nungi sangdong ka agütsüba sülen Muslim nunger lokti jagi Basti Maharawala kiyong nung Presbyterian Tenla ki asem, Catholic Arogo Tenla ki ka, Full Gospel Assembly Church Tenla ki ka aser Salvation Army Tenla ki ka raksatsü.

Iba mapang nungji Khristantem teimbaka jenshia liasü.

Tenla kitem raksatsüba sülen Muslim nunger lenirtem telok kati Jaranwala semdanga tensa süngjemdaksütsü meranga liasü.

Tamalen Lahore High Court-i police dang CCTV nung anguba mejangjaba nisung 100-150 maitsüji jangjaba sülen parnok ajak puang, ta tuyua liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngsem

(n) lokti nung züngokba, tenüngteta aniokba (member)

* Arogo nung züngsem shia sen noklangkaka saru sarur.

Züngshi

(v) lepshia ano khen azüng (recount)

* Sen azüngdang züngpetba agi ano khen züngshi.

OLONG PAITEP # 7600

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPIEN

1. Inyaker ajangtetba

-(3)

3. Bangsemo adokdak

-(5)

6. Shitak mesüi inyak

-(7)

7. Ya mimong nung angur

-(3)

9. Reprangzük

-(4)

10. Tasola

-(5)

11. S _____

-(4)

13. Yagi ajak ashioxtsür

-(3)

15. Ki aokba oset

-(7)

17. Ak shi nung inokba tasen

-(5)

18. Ishika

-(3)

LANGTSÜNGLEN

1. Meshidak

-(3)

2. Tanaben soshir

-(7)

3. Iba anogo

-(4)

4. Meshi

-(3)

5. Yagi mi tsükloker

-(9)

6. Shi tapu ka

-(9)

8. Yagi ayimer saka ozü masü

-(3)

9. Ajokba shiruru ka

-(7)

12. Inyaktet

-(4)

14. ____ hi

-(3)

16. Akümüli nungi pilar

-(3)

OLONG PAITEP # 7599 TELANGZÜBA**TIPIEN :**

1. Kilir, 5. Lasüng, 7. Samaru,

11. Jaka, 12. Naro, 15. Langzü,

17. Mapang, 18. Arong.

LANGTSÜNGLEN :

2. Lasa, 3. Kar, 4. Ana, 5. Langtsüng,

6. Sujung, 8. Rajem, 9. Arogo,

10. Tanela, 13. Züno, 14. Lao,

16. Ano.

NAI-A YA METETTER

Haryana nung August 13, 2026 nü Tiranga Yatra alidang kilometre 5 talang aser feet 10 tulu Indian flag ka amshiba ajanga Guinness World Record ka yangluogo. Iba Yatra yagi tesem 20 adena süi aser lenmang piyong tanur-tain, tetsür-teburtemi shilem agia liasü.

Manipur IDPs-i relief camps nung wako tanak atsüket**Imphal, August 15, 2026**

(Agencies): Manipur kübok tesem balala nung relief camps nung alir Internally Displaced Persons (IDPs)-i August 15 nü wako tanak songogo aser iba ya Independence Day benjungmung anema lungkak aita lir.

Sajiwa, Sawombung aser Akampat dena relief camps aika nung nisungtemi lungkak ait aser parnoki wako tanak atsüketa parnok talidak toxtsür aoba aser

tebilemtsü khuret atema lemtet ka magitetba tejashi sayuogo.

Küm asem tema nisung meyrjang aika relief camps nung liyonga arur. Onok tashiyim agi pei talidak toxtsür odaktsü aser return, rehabilitation o livelihood atema kecha tia ajurutsü memetet lir ta relief camps nung alirtemi ashi.

Parnok mapang talangka pei talidak toxtsür alitsüsa akümba ajanga akhüm mali kümogo, security mangur, taküm libaliroa

mouteter aser akhi ama kibong lia aruba ama meliteter. Nisung aika pei talidak mali yutsür kodaser Independence Day benjung amungtsü ta parnokisa asüngdangogo.

Wako tanak ajanga onok kiojen aser taküm libaliro samaba maitsü sayur. Onok asoshi 'Har Ghar Tiranga' tetezü kecha mali kechiyong onok benjungtsü atema 'ghar' mali ta lungkak aitertemisa metetdaktüsügo.

Partition ajanga Zo-Chin nung piladaktsü: Mizoram Governor**Aizawl, August 15, 2026**

(Agencies): 1947 nung Partition of India ajanga nisung aika pei talidak toxtsür aoba dang masü saka political boundaries ajanga Zo-Chin nung lemdangtsü ta Mizoram Governor Vijay Kumar Singh-i ashi.

Mizoram Art and Culture Department-i Vanapa Hall, Aizawl nung Partition Horrors Remembrance Day sentong ayonga agidang Chittagong Hill Tracts (CHT) lemdangba ajanga Zo-Chin nung aika piladaktsü ta Vijay Kumar Singh-i ashi.

Zo nung dang Chin-Kuki-Mizo teloktem ta ajar aser parnok ya northeastern India, Bangladesh nung CHT aser Myanmar nung Chin State nung alir.

India putiotsü nung temulung shirangtsü tatalokbatem rongnung Partition ya ka liasü kechiyong iba ajanga nisung million aika pei talidak aser rongsen toxtsür aotsüsa tensa ajuru. Iba mapang kibong aser loktitem piladaktsü aser nisung taküm aika sama ta Governor Singh-isa ashi.

Partition mapang nisung

million 10 nungi 14 tashi pei talidak toxtsür aotsüsa aküm. Arrtsütem aritepa lading aser iba ajanga nisungtem aser kintem madak zübo tulu ketdaktüsü ta paisa shisem.

"Tanü ya komo tejen lapokba mesüra tai tongloktüsü sentong ka masü. Iba anogo ya takoksa ajururtem bilemtetba, parnoki akanga noktakba tushiba aser putiotsü nungi tansütsü agir tarutsü nung asen linük nung ibala mataloktsü atema angatetba mapang ka lir" ta Governor-isa metetdaktüsü.

Assam sorkari teyirur shia nem Rs 2 lakh agütsür**Guwahati, August 15, 2026**

(Agencies): Assam-Arunachal Pradesh arrtsü anasa Dhemaji district nung nisung 11 injang agi yirutsüba atema Assam sorkari senotsü teyari agütsütsü metetdaktüsügo.

Iba lendong ya August 10 nü Bodoti village anasa atalok. Ali atsünga agiba atema ken o ka

nung injang khaloktsü.

Honibarnü yirua alirtem nem cheques agütsütsü ta Assam Education Minister Ranoj Pegu-i ashi.

"Bodoti nung nisung 11 shia nem Rs 2 lakh agütsüba atema Chief Minister Himanta Biswa Sarma dang pelar" ta Pegu-i ashi. Minister Pegu-isa Assam

Medical College and Hospital (AMCH), Dibrugarh nung yirua alirtem semdanga liasü.

Iba tatalokba ajanga Assam nung lungkak aittsü tenzüka liasü aser Mising nung kaketshir tongti telok Takam Mising Porin Kebang (TMPK)-i Bodbar nungi Arunachal Pradesh anema economic blockade tenzüko.

Manipur nung Liangma Naga nung 2 khaset**Imphal, August 15, 2026**

(Agencies): Kangpokpi district kübok Langka Naga village nung Hokolbarnep telungpurtemi nisung ana khaset aser nisung ana yirutsü.

Iba tatalokba sülen Liangmai Naga Council, Manipur (LNC-M)-i emergency shutdown sangoktsüogo aser Tangkhul Naga Long-ia ozüng alema inyakba aitsüogo.

Iba lendong nung taküm

samar ana ya Wiriliangbou Chawang, 35, aser Kawidinang Abonmai, 54 na ta jangjaogo. Külen, Maliangjinang Abonmai, 50 aser Namthiulungbou Prinmai, 45 na Indian Army-i Haochong nungi nikongdang 5:30 ako meta tayimtsü ajanga Regional Institute of Medical Sciences (RIMS), Imphal-i anir oa anepaludar.

LNC-M-i Liangmai Naga nung aliba tesem ajak

mokdangtsü metetdaktüsügo. Tanep 7:30 ako meta KNF-P telungpurtemi Naga village volunteers ana khaset aser aika yirutsü ta LNC-M-i ashi.

Kuki National Front (KNF) tanishir Jangboi Kipgen-i anir telungpur 50 shi ka den Kuki Revolutionary Army (KRA) züngsemtem densemer amak ta Working Committee of the Tangkhul Naga Long (TNL-WC)-i metetdaktüsügo.



Mizoram Chief Minister Lalduhoma-i Lengpui Vengthar nung Samuel Lifecare & Cosmetics Private Limited lapoktsüdang agiba noksa ka angur. Iba manufacturing company ya Dr. Lalrokhawma aser par kibong tenzüka lir aser küm asem tashi research & development süa arur cosmetics tapu 46, home-care products 9 aser food supplements 2 yanglutsü tenzüko. Iba company lapokba ya Mizoram atema dang masü Northeast ajanga atema tongtipang lir kechiyong iba ya alizüng ka atongba ama lir ta CM Lalduhoma-i ashi. Iba company-i research aser development ajanga formulas yangluteta products yanglur aser Northeast nung cosmetics sector nung mezüngbuba lir ta Lalduhoma-isa ashi.

Indonesia menoknok nung nisung 38 asü



Indonesia nung Honibarnep menoknok 7.7 magnitude anokba sülen ki laor alidak ketdangsür temi nisung bushiba noksa ka yangi angur. Iba menoknok lendong nung nisung 38 süogo ta ashir.

Jakarta, Luroi/August 15 (Agencies): Indonesia nung Honibarnep menoknok 7.7 magnitude anokba sülen nisung 38 süogo, ta iba linük indang disaster mitigation agency ajanga ashir.

Search and rescue operations tenzüka lir aser nisung asüba ya maneni timba akumer. Nisung aika yimya balala nung yiru, ta BNPB agency ajanga ashir.

Iba menoknok aser iba sülen ter ben dak tali anokshitsüba ajanga ki o jen aika raksaogo.

Menoknok ya Honibarnep 5:00 ako sülen Flores asetkong nung anoka liasü. Iba menoknok ya ali telung 15km lur anak, ta Indonesia indang meteorology and geophysics agency ajanga ashir.

Menoknok komaka tema nung anokdir, yamaji ali tema nung teraksa tali ajurur.

Kasa tesem nung 'after-shocks' liasü aser kabo 6.1 magnitude liasü.

Maumere rongnendak

tangokba video ka nung concrete tuluka terminal building nungi tsüka inter-island ferry ka nung amentsü atatepa aliba pas-sengers tem dak tsük. Rong-i aiba gangway sükdakba mapang nisung kar tzü nung tsüka liasü.

East Nusa Tenggara province indang governor Emanuel Melkiades Laka Lena-i osangbener senden ka nung jembidang, nisung kar mejanga lia ki chirepa asü.

Menoknok anokba sülen tsunami warning ka sangdong saka tzü balaka timba makumba ajanga ghonda asem lir iba tekumdangtsü agiena liasü.

Ketdangsür temi tsunami warning agütsüba sülen nisung aika motorbikes nung tekong tenemlen bushia ao. Nisung 2,000 shi pei anizüker ao mesüra pei sasa ainshi, ta BNPB ajanga ashir.

Sikka province nung nisung asem asü, Manggarai province nung nisung trok asü aser East

Manggarai province nung nisung pongu asü ta ashir.

Nisung ana kanga sashia yiru aser 11 tera yiru, ta disaster agency ajanga ashir.

Nisung aika pei kidangi aotsü tetsübo nung kima lir ta ashir.

Region nung iba menoknok agi teraksa adokdaksüba asadangtsü mapang agitsü, koba tezülen aser tenem agi sünga lir.

Iba lendong atalokli osangtem ajanga ashiba agi, nisung aliba ki 54 kanga sashia raksa, healthcare facilities pongu, tekülem ki asem, sorkar indang ki trok, kaket reju ka aser warehouse ka raksa.

Manggarai province nung tesashiba kongshi, ta BNPB ajanga ashir.

Parnoki nüburtem dang süngjema aser tzükum nungi pila aser raksar aliba ki o jen anasai maotsü metetdaksüogo.

Indonesia nung menoknok aser volcano kanga bulua ajurur, koba tectonic plates tulu asem ajurutedpak lir.

MENUNGRA BILEMTETER



Late Mrs. Kikachila Ungma

Tsüngremer arishi temjena tembanger, tanü Luroi 16, 2026 nü, küm ka ajunger. Saka onok asoshi pungmang ka ama anogo shia na menungra bilemteter. Na onok den meliaka, ne menürem jakten, mapa tajung aser tsüng O tem onoki kodanga mamatsü.

~ Temeim Kinungbo, jala, jabaso aser kinungertem.

METONGSHITSÜR

Tir Yimyim adok 302 Rogonü, Luroi 14 2026, tapak 7 nung Asür K. Jongmamangyang Lemtur (Mopungchuket) MULUNGNEEN O column tarensen 5 buba nung Lt. Imotiba Sungratsü chirnurtem ta alibaji Lt. Imotemba ta metongshitsür. Aibelenba asoshi sasar.

Rohingya refugees 300,000 dak tema meyipa anir arutsü: Myanmar

Bangkok, Luroi/August 15 (Agencies): Myanmar nung mitkari bhukumba sorkari Honibarnü ashiba ashir, Rohingya refugees 300,000 dak tema Bangladesh nung camps balala nung aliba ya taoba mapang anüolen Rakhine state nung alirtem lir aser security tensa tajungba akumba sülen parnok meyipa aruba agizüksü.

Rohingya refugee tebilemtsü adoker ita toku buba nung ayaoka aiba mapang Ministry of Foreign Affairs ajanga iba sangdong ya agütsü, aser refugee meyririjang aika tang tashi Bangladesh nung camps balala nung alir, shirnok Rohingya telungpur telok kati Rakhine nung guard posts ka amakba sülen mitkar temi item telungpur bushi tezükba ajanga August 2017 nung Myanmar yutsür jena ao.

Iba operation ya ajanga Rohingya nunger 700,000 dak tema arütsü alema Bangladesh nung oa jenok, kong taoba mapang Myanmar mitkar temi azüdokshiba ajanga meyririkang aika oa jenoka alidak parnok anenok.

Iba mapa onsara sashia inyakba ajanga UN densema international community nungi kin samatsütsü merangba lir ta tai tongloksü.

Taoba mapang Burma ta ajaba Myanmar-i par linük nung lawful ethnic minorities 135 aliba nung Rohingya ya ka ama mezüngshir aser parnok ya Bengalis ta athishir, koba Bangladesh nunger Myanmar nung ozüng alema arua alirtem ta ashir.

July ita tatemlen Bangladesh-i agütsüba refugee tenüng 828,824 nungi 426,545 jangjaogo aser jangjar alirtem nungi 308,797 ya taoba mapang Rakhine nung alirtem lir ta jangjatetogo, ta Myanmar-i ashir. Ministry of Foreign Affairs-i ashiba agi, nisung 113,507 mejangjateter aser kiralongra mapa inyakba nung dena alir nisung 4,241 jangjatetogo.

Rakhine nung tensa tajungba akumba sülen taoba mapang yangji alirtem tanaben agizüksü

atema Bangladesh sorkar den maneni inyaksü, ta sangdong ajanga ashir.

Rakhine nungi nisung million ka dak tema jena ao ta jembiba ministry-i magizük aser 2017 küm azüdokshiba sülen nisung 540,000 dak tema Bangladesh-i ao aser nisung 200,000 dak tema northern Rakhine nung lir ta ashir.

Myanmar aser Bangladesh na 2018 nung küm ana 'repatriation process' atema mulungtepa liasü. Ajisüaka 2021 küm Aung San Suu Kyi indang sorkar army temi atsüngdokba sülen Myanmar nung tensa tamajungba kuma nok-nü amer mitkar anema nokdak tenzük. Refugee tem meyipa anir aotsü sentong takok mongui lir.

Rakhine nung aliba ethnic Arakan Army telok aser mitkar tsüngta 2023 küm iba region agi raktepa raraba ajanga mepetmesü asendenshia ano refugee timba Bangladesh tsütsü aser tesem balalai parnok takum kumzüksü mechi jena ao. Rakhine tesem timba Arakan Army kübok lir.

Refugee camps nung tensa majungba, bendang lima nungi teyari agütsüba ajema akumba aser Myanmar-i meyipa aotsü teimla tajung makai akumba ajanga Rohingya refugees tem rong tila aser tamajung nung mener tzüyim ajanga Malaysia aser Indonesia atongtsü meranger timba kumogo.

Repatriation program nung shilem ka ama tang Malaysia nung aliba Rohingya refugee 5,000 meyiba agitsü Myanmar-i mulungogo, ta July ita tatemlen Malaysia Ato Kilonser Anwar Ibrahim-i shia liasü.

Ajisüaka iba mapang Myanmar indang foreign ministry nungi ketdangsür Han Win Aung-i, iba repatriation program ya tejangja Myanmar senso tang Malaysia nung detention centers nung alirtem kisüng atema lir aser sorkari Rohingya nunger agizüksü ta osang prokshiba ya tiazü lir, ta shia liasü.

Netanyahu-i UK dang 'Islamic republic' ajaba atema aitsür

London, Luroi/August 15 (Agencies): Israel Ato Kilonser Benjamin Netanyahu-i UK ya "Islamic republic" ama athishia jembiba sülen Hokulbarnü Britain-i iba ama o jembiba khenyongi magizüker ta aitsü aser Israel sorkar nem iba ken o agütsüogo ta ashir.

Netanyahu-i Israeli army radio podcast atema sensaksema mapang Britain-i Israel den tesendaktep junga maliba aitsüdang pai iba o ya jembia mangatettep tenzük.

"Nuclear nok-nü aliba Islamic republic mezügbubaji Islamic republic of Britain asütsü ta nisung kari mapang ka ashir," ta Netanyahu-i ashir aser Israel-i Iran nung iba amaji mesüdaksütsü asoshi inyaker ta shisema liasü.

UK sorkar indang odongtar kati ashiba agi, item o ya khenyongi magizükteter aser itemji Israel sorkar nem metetdaksüogo.

Netanyahu ya Winston Churchill'er semchir Winston Churchill-i 1967 Arab-Israel rara mapang Israel bhukumba



Benjamin Netanyahu

indang jembia liasü. Britain-i tanüa kasaji Israel bhukumer asü masü ta asüngdang aser iba sülen "Islamic republic" o ya ashir.

Israel sorkari indang odongtar David Mencer-ibo Netanyahu ya nisung kari jembiba lephirba liasü ta ashir.

"Pa (Netanyahu) ya nisung kari jembiba o athishia jembiba liasü," ta Mencer-i ashir, aser ibaji US Vice President JD Vance alitsü.

Vance-i 2024 küm Munich Security Conference mapang iba mesük o ya jembi aser "Britain ya nuclear nok-nü aliba chichiba Islamist linük mezügbuba akumtsü," ta shia

liasü. Iba mapang Vance-i jembiba o ya British yimten yimsüsür temi aija liasü.

Israel mitkar inyaksangshi aser Middle East rara mechi London aser Jerusalem tsüngta mangatettep tali akumba mapang tang tesüsa iba mangatettep ya adoker.

Taoba küm Palestine nunger linük ka lir ta Europe nung linük kari agizükba rongnung Britain ya liasü, koba ajanga Israel ain adok. US-Israel nati Iran anema raraba nunga UK kanga kumdanga nokdaka lir.

Iran-i nuclear nok-nü yangluba Israel-i nokdangtsü ta Netanyahu-i aiben shia lir, saka Tehran-i iba ama nok-nü yanglur masü ta ashir.

UK aser US ket nung nuclear nok-nü lir, aser Israel ket nunga mesangdongi nuclear arsenal alitsü südi ta aikati amanger. India-i 1998 küm nuclear tendangba sülen kasa küm Pakistan-ia tendanga Muslim nunger timbasür aliba linük ka nung nuclear nok-nü aliba linük mezügbubaji Pakistan ya akum.

Australia nung Bangladesh-i mezüing takok angutsü teimla nung lir



Australia O Bangladesh na Test cricket mezüingbuba asayaba noksa nung angur.ogo.

Darwin, Luroi/August 15 (Agencies): Spinner Mehidy Hasan Miraz-i tongtipang asayar Steve Smith out süja Darwin, Australia nung Bangladesh asoshi cricket Test mezüingbuba takok angutsü anasai ogo.

Smith ya aiben Australia indang cricket nung tia tajung bener arutsür ka ama züingshir, saka pai Honibarnü asaya nung ball ya off-spinner Miraz nem indang-indanga züklokja runs 44 yanglur lia out asü aser par telok ya innings tanabuba nung 122-4 nung yutsü.

Tanüingba session nung Australia nungeri junga asaya saka 161-4 nung tembangba yong Bangladesh meneptsü ano runs 67 nüngdaker.

Mezüing Test kumzüksü par teimla ya Cameron Green ket nung lir, shiba runs 43 yanglur lir aser Alex Carey runs 19 yanglur lir.

Hokulbarnü Bangladesh-i 351-6 yanglur aliba Honibarnep

ano runs 75 bendenlok, konbg Miraz-i runs 65 yanglu aser Australia nunger Josh Hazlewood-i runs 89 agüja wicket trok agia pa asoshi Test wicket 300 agiteta liasü.

Miraz-i ball 154 nungi runs 65 yangluteta Bangladesh lower order temi Australia nunger aniseta bowling asütrm tezü tangdaksü.

"Onoki tesüiba anogo anasem asayaba ya kanga alakteta asayatetogo. Anungji parnoki yamai asayatetba ngua kanga pelar," ta Bangladesh capiatin Najmul Hossain Shanto-i ashi.

Lunch süli 426 nung lia out sütsümaba sülen Bangladesh seamer Hasan Mahmud-i Australia nunger aoksaja opener anaprong mela-mela out süja liasü.

Arishi küm 26 tain Mahmud-i mezüing innings nung career-best 6-55 agia liasü aser Hokulbarnüa Jake Weatherald

(0) aser Travis Head (17) out sütsü.

Marnus Labuschagne aser Smith nati tanem-tanemi asaya saka Labuschagne ya runs 31 yanglur lia Taijul Islam-i out sütsü.

Smith-i kanga kumdanga asaya balls 88 nung runs 44 yanglu, saka pa out asüba ajanga Bangladesh temulung ulua akum aser Marrara Oval pitch nung pa out asüba ya takok angur ama pelatepa liasü.

All-rounder Green aser wicketkeeper Carey nati kanga kumdanga asaya anogo tembangdakja liasü aser teimla ka nung anogo pezü bubai ayaoka aitsü.

Australia nungeri kodanga home Test nung Bangladesh nem mokokdaksü aser Mirpur nung 2017 küm Test trok asayaba nung khien dang tamakok ajurua lir.

Ibai Test series ana nung mezüingbuba asaya alitsü.

DDCA-i club registration atema metetdaksür

Dimapur, Luroi/August 15 (TYO): Dimapur District Cricket Association (DDCA) ajanga sangdong ka nung, tang aliba cricket clubs aser registration agitsü tebilemba aliba clubs tasentem dang aruya aliba cricket season atema annual registration aser renewal process tenzüksü renema lir, ta metetdaksü.

Official inyakyim ajunga nung tetsükdaksü makai shilem agitsü atema clubs ajungai DDCA nung mapang shidak nung registration mesüra renewal asütsüla.

Registration ya August 17, 2026 nü lapoktsü aser August 25, 2026 nü shibangtsü.

Iba sülen applications mesüra renewals kecha magizüksü. Anungji club ketdangsür ajunga dang mapang shidka nung nüngdakba mera agitsü ayongzüker, ta sangdong ajanga ashi.

Registration forms, guidelines mesüra osang tali tejangjaba metetner temi DDCA helpline 8794545053 nung tongteprateptsü akok, ta DDCA sangdong ajangasa ashi.

Atletico Madrid-i Argentina defender Cristian Romero alizükogo

Madrid, Luroi/August 15 (Agencies): Atletico Madrid-i Honibarnü Tottenham nungi 2022 World Cup winning centre-back Cristian Romero sen 40 million euros (\$46 million) agi alizükogo.

"Romero-i ozü club atema June 30, 2031 tashi asayatsü zülutepogo," ta Atletico-i sangdong ka nung ashi. Argentina nunger international jenjang nung asayasang ya taoba ita World Cup final nung Spain-i akokba telok nung dena liasü aser Atletico-i taküm meyi mapang Alejandro Grimaldo, Kang-in Lee aser Morten Hjulmand nunger anir aruba sülen Romero ya asayar pezü buba alitsü. Arishi küm 28 tain Romero-i Suprs gans tem

dang Hokulbarnü tatem salem ashi, shiba north London indang clum nung küm pongu asaya liasü.

Küm 17 asaya takok marok monguteti arur 2025 Europa League final nung Manchester United madak takok anguba mapang Romero nem man of the match konang agütsü.

Romero ya Spurs atema 156 asayaba mapang suspensions ishika liasü aser pai iba club nung tajungtiba nung shilem magitet saka temulung süa asayar aor, ta ashi.

Kasa linük nungi World Cup winning defender Nahuel Molina-i Serie A nung AS Roma nungi asayatsü atema Atletico yutsür ao. Molona ya sen 17 million euros agi alizük ta ashir.

MDFA-i ayongzüka Mokokchung nunga 'Futsal Day' amung

Mokokchung, 15th Aug (TYO): Mokokchung District Football Association (MDFA)-i August 15 nü Koridang Futsal Ground, Aolijen, Ungma nung "Futsal Day" nüngtem sentong ka ayongzüka mungogo.

Sentong nung MDFA Tir, N. Akok Longkumer-i jembidang, football ya lokti ajungai meimba saisabong ka lir, ta ashi. Nagaland Football Association-i küm piyong inyakba den külemi state tesem balala nungi telok balalai futsal asayamung ayonga agiba ajanga Nagaland nung football kanga sapua ajungketogo, ta pai metetdaksü.

Pai ashiba agi, tanü iba sentong ayongba ya All India Football Federation (AIFF) aser NFA tetuyuba kübok amunger. N. Akok-i asayartem ajungshia ashidang, football asaya nung bendanga agüja shilem agitsü aser meranga asayatsü

ayongzüker. Paise Mokokchung Press Club (MPC)-i küm aika iba association nem maneni teyari agütsüba atema pelaba metetdaksü aser tarutsü nunga maneni yariteptsü mepishia metetdaksü.

Sentong nung Ungma aser Merepkong Ward nungi U-15 team ana tsüngta futsal asaya liasü. iba den, Mokokchung Press Club o MDFA na tsüngta exhibition match ka asaya, iba asaya nung MDFA-i goal 7-4 agi akok.

MDFA team ji President N. Akok Longkumer-i anir Supongsang, Yimya Jamir, B e n d a n g m o n g b a , Lepzungchiba, Limasenla, Alapong, Nokzenpongba aser Bendang liasü. MPC telok nung tir Sashimeren-i anir Naro Longchar, Ajung Kichu, Yarden, Imnawapang, Akangnungsang, Moasashi aser Imrongkumba parnok liasü.

FIH Men's Hockey World Cup 2026: India-i Wales akok



Amstelveen, Luroi/August 15 (Agencies): India-i FIH Men's Hockey World Cup 2026 campaign tenzüka Honibarni Wagener Stadium, Amstelveen nung Pool D match mezüingbuba nung Wales madak 3-1 agi takok ngua liasü.

Asaya mezüing quarter nung Sanjay aser captain Harmanpreet Singh nati penalty-corner ana nung goal ka-ka agüja India temaba jenjangi atu. Sanjay-i asaya tenzüker minute ti buba nung goal ka ya agütsü aser minute asem lir Harmanpreet-i tanabuba goal ya agütsü. Anisüngzüka sülen India-i

maneni asaya azüoktet aser Harmanpreet-i iba asaya nung tanabuba goal ya minute 43 buba nung penalty corner ka nungi yokteta 3-0 akum.

Wales nungi Sam Welsh ajanga minute 55 buba nung goal ka ya agütsütet. Ajisüaka India indang defence-i kanga junga asayateta points asemprong soita yuteta liasü.

Iba takok ya ajanga India ya Pool D nung temaba jenjang nung yutsü aser August 17 nü England den asayatsü.

India ya Pool D nung England, Wales aser Pakistan den lemozüka lir. 1975 edition final

nung India-i Pakistan madak 2-1 agi takok anguba sülen tesüiba küm 50 tashi India-i World Cup takok marok monguteti arua lir.

2023 küm Bhubaneswar, India nung asayadang India ya jenjang toku buba nung liasü aser India ya nükla tulu yur inyaker, shirnoki Olympic bronze medals anaben ashidena akokba den Asia Cup title ka, Asian Champions Trophu ana aser Asia Cup gold ka koka lir.

Asaya metenzükdang Harmanpreet Singh-i, linük FIH Hockey World Cup title atema küm 51 ataba tembangtsü temulungtetba nung lir aser asayamung nung bendanga agütsür asayatsü renema lir, ta shia liasü.

World Cup ya team asoshi maongka tuluka lir, ta Harmanpreet-i ashi.

"World Cup ya onok ajak atema maongka tulu lir, kechiaser iba World Cup sülen kechi ataloktsüar memetet. Team nung senior players kar lir, aser onok atema ibai maongka tulu lir," ta Harmanpreet-i shia liasü.